



### Nov project da chant dal Chor Surselva

Il dirigent dal Chor Surselva ha instradà in nov project cun ina messa festiva ed ovras da Mozart.

3



### Festa federala cun 20 chors dal Grischun

A la Festa da chant federala sa participeschan 425 furmaziuns cun 120 000 chantadurs.

9

südostschweiz

# LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

## Il feagl official semida

■ (anr/abc) Dapi prest 200 onns dat ei in feagl official cantunal. En differentas periodas ha quel adina puspei retschert in niv vestgiu. Dapi decennis cumpara el sco carnet el format A5, ner-av, schetg e senza illustraziuns cun circa 50-60 paginas. Naven digl onn proxim vegn quei a semidar. Aunc uss ei la comunicaziun buc officiala. Il vice-canceller Walter Frizzoni ha denton confirmau sin damonda dall'anr ch'ei detti ina midada tier il feagl official cantunal. Quel cumpara probabel naven digl onn 2016 buca pli sin pupi, mobein vegn producus mo

pli en fuorma digitala. Tgi che abbonescha el sa leger las informaziuns mo pli sil finistrel dil computer ni dil telefonin. La midada vegn comunicada per il november. Tgi che vul abunar in exemplar dil feagl official cantunal retscheiva denton l'informaziun ch'ei detti restructuraziuns. Era il cussegl grond ei informaus tras il preventiv cantunal 2015. Leu indichescha ina tabella senza cefras ch'igl ei da spitgar ina midada. Actualmein cumpara il feagl official en ina ediziun da 7100 exemplars.

> PAGINA 2

## Alla tscherca da soluziuns

Las suprastonzas communalas da Tujetsch e Mustér ein s'entupadas

DA HANS HUONDER / ANR

■ Las suprastonzas communalas da Mustér e Tujetsch vulan tscherchar soluziuns concernent igl avegnir dil turissem sisum la Surselva. En ina emprema fasa vulan omisduas far ponderaziuns en tgei fuorma cunfinuar. Il gliendisdis sera ein las suprastonzas communalas da Mustér e Tujetsch s'entupadas per dilucidar la situaziun turistica sunter che la vischnaunca da Tujetsch ha sistiu la collaboraziun cun Sedrun Mustér Turissem. Sco quei ch'ils presidents communalas Beat Röschlin e Francesco Cajacob communiceschan eis ei vegniu discutau intensivamein davart la situaziun actuala dall'organisaziun da turissem. Omisduas suprastonzas communalas han presentau lur interess e la fin finala era pesau giu quels. Ins hagi avunda puncts communalas. Quei meini alla conclusiun che omisduas suprastonzas tscherchien ussa pusseivladads per soluziuns. Tujetsch ha visau il contract cun Sedrun Mustér Turissem sin la fin da matg 2015. La suprastonza communalala s'accorda buca cun quei che succeda enteifer l'organisaziun turistica. L'jamna vargada ha il president



Il turissem da Mustér e Tujetsch ei al spartaviis. En tgei direziun semovan las vischnauncas egl avegnir?

FOTO H. HUONDER

communal Beat Röschlin punctuau ch'ei maunchi ina clara analisa dalla posiziun actuala e strategica en collaboraziun cun ils purtaders da prestaziun da Mustér e Sedrun. Ils camps da fatschenta seigien buca definai cla-

ramein, leutier maunchien linguas da product e products sco era plans per mesiras en favur dalla destinaziun da vacanzas Sedrun Mustér. Las gruppas turisticas avisadas stoppien vegnir definidas claramein. La vischnaunca da

Tujetsch ei promta da prestar la contribuziun mensila da 70 000 francs entochen la fin d'october 2015 a Sedrun Mustér Turissem sco era las obligaziuns enviers Grischun Vacanzas entochen la fin d'avrel 2016.



Daniel Pally (sen.) e Conradin Klais ein responsabels per la part cantica e musicala dil teater «Oh Tavanasa».

FOTO P. DUFF

## «Oh Tavanasa» –

### la part musicala dil teater

■ (anr/ff) In sguard ellas canzuns dil teater musical «Oh Tavanasa» che vegn daus per la fiasta da 1250 onns Danis-Tavanasa relata il cuntegn da quel. La retrospectiva cun historia, destins e l'egliada el futur cun speronzas fuorma la communitad d'in vitg. Talas facetas ein cuntenidas ellas canzuns dil teater. Cant popular ei d'udir ed era las canzuns che raquentan dil vargau. Conradin Klais ed Armin Caduff segnan per

cumposiziuns novas ed arranschaments da cant. Il Chor Uvriu s'engascha cun siu dirigent Daniel Pally per il beinreussir dallas produziuns. Igl ei ina manifestaziun comunabla dils avdents da Danis-Tavanasa en mongia cun tals da Dardin e da Breil e bein enqualin d'ordlunder ch'ei oriunds dalla vischnaunca s'engaschan per la festività locala.

> PAGINA 3

## ALVRA

### Grond interess pigl referat

(anr/gns) An rotschas en commembers e simpatistants dalla Parteida populara svizra nias a Lai per assister agl referat dalla patrunga dalla «EMS Chemia» Magdalena Martullo-Blocher. Da sa preschentar a Lai, per l'amprema gEDA public, scu uffiziala candidata dalla pps grischuna pigl cussegl naziunal fetscha grond plascheir, è detg la feglia digl anteriour cussegl federal Christoph Blocher. Tranter oter è el-

la detg tgi da mantigneir chegl tgi vagn fiss savens migler tgi sa vischinar adegna pi ferm all'Uniuin europeica, scu chegl tgi ena gronda part digl parlamaint ed igl cussegl federal less. Igl spazi liber, la libertad, la neutralitad e l'indipendenza, chegl totga tar la Svizra e tar sia cultura, er schi dalla vart sanestra vegian chels aspects adegna pi paca muntada.

> PAGINA 8

## Avertura d'una nou'ustaria ad Ardez

■ (anr/afi) Daspö tschinch ons spordscha la famiglia Clalüna d'Ardez a giasts pernottaziuns in lur bain pac dadour Ardez. Causa las pretaisas da vart da l'Uffizi chantunal per la sgürezza da victualias e per la sandà d'animals sun gnüdas plü severas han els decis da far ulteriuras investiziuns in lur pauraia. Els han ingrondi lur sporta turistica cun fabricar our d'una part da la stal-

la ün'ustaria. Intuorn la stalla han Marianna e Fredi Clalüna installà üna pitschna piazza da giovar per uffants. Per il di d'avertüra han els sport sper üna tschaina eir ün'attracziun nouva illa regiun. Il «hof-theater.ch» ha preschantà üna cumedgia culinaria cundida cun ironia, satirica e musica.

> PAGINA 7



D'incuort ha gnü lö ad Ardez l'avertüra da la nouva ustaria La Stalla.

FOTO A. FILLI

## Concept dal campegi Müstair plascha

■ (anr/rgd) Il concept dal «Camping Muglin» a Müstair culla stretta colliaziun cun l'agricultura para da funcziunar. La famiglia Zangerle es pronta pella quarta stagiun da stà. Il vegl campegi «Clenga» chi d'eira posiziunà da la vart dretta dal Rom as rechattaiva illa zona da privel ed ha stuvü gnir serrà a la fin da l'on 2011. Fingia il prosem on ha drivi pac davent ün

nouv campegi sias portas. Ill'antieriura stalla ed il tablà dal pair Wendelin Zangerle han seis figls Ivan ed Enrico fabrichà l'infrastructura per pudair retschaiver giasts cun tendas o rulottas. Da prüma davent ha il «Camping Muglin» lavurà insembel cul pair vaschin Isidor Sepp chi tegna chavrinas e lamas.

> PAGINA 7



L'antieriura stalla da Wendelin Zangerle serva uossa sco bistro dal campegi.

MAD



30023

Servetsch d'abunents e da distribuziun: tel. 0844 226 226 mail: abo@somedia.ch

# «Mengia blers parlamentaris professiunals»

Lai: Radunanza dalla pps regiun Alvra

DA GION NUTEGN STGIER / ANR

■ **An rotschas èn commembers e simpatistants dalla Parteida populara svizra nias a Lai per assister agl referat dalla patrunga dalla «EMS Chemia». An en colp è ella gudagnea la simpateia digls preschaints, betg angal perveia da sies votums, mabagn er graztga a sies humor e sies sa mussar natural.**

La Parteida populara svizra digl Grischun (pps) è tscharnia Lai scu li per dar l'antschatta agl cumbat electoral per las elecziuns naziunales 2015. Chegl è er sto igl giaveisch digl pi prominent candidat dalla pps tgi sa metta a disposizion per eventual eir a Berna aint igl cunsegl naziunal, schi chegl è la viglia digl suveran grischun. Igl sies nom è nign oter tgi *Magdalena Martullo-Blocher*, siva da 12 onns la patrunga dalla pi gronda interpresa da noss cantun. Da sa preschentar a Lai, per l'amprema gEDA public, scu uffiziala candidata dalla pps grischuna pigl cunsegl naziunal fetscha grond plascheir, è detg la feglia digl anteriour cunsiglier federal *Christoph Blocher*. Siva da prest en onn vegia ella ena tgesa da vacanzas a Lai ed ansomma vegia ella fitg a cor chella regiun digl Grischun central. Tant scu pussebel passainta ella cun sia famiglia igl taimp liber a Lai, noua tgi tots gioldan la singularitad da chel li. «Savognin e Tinizong canoscha er bagn cun esser stada da mattatscha adegna puspe an Surses scu manadra digls curs da J&S (Jugend und Sport)», è detg *Magdalena Martullo-Blocher*. Ansomma vegia la regiun Alvra/Surses scazis culturals e valours scu pacas otras regiuns, tgi valan la pagna da mantigneir, tgiar e betg disfar. L'agricultura, igl turissem ed er l'economia seian da gronda muntada per chella regiun e gist la valeta da chellas branschas seia da dar anavant, e chegl bod, ainten mintga fa-



Werner Wyss, igl president dalla pps regiun Alvra, e Magdalena Martullo-Blocher, la candidata dalla pps grischuna pigl cunsegl naziunal.

FOTO G. N. STGIER

miglia svizra. Er la folclora populara e genuina dovra la Svizra ed er da chella seia dad aver chito, è accentuo *Magdalena Martullo-Blocher*.

## Bung dad aver en tiradour an famiglia

Strousch tgi la famiglia vegia piglia parzial dimora a Lai vegia ella er s'infurmo schi exista ainten la regiun ena sezziun dalla pps. Igl pi grond plascheir da chel interess è sa tgapescha gia *Werner Wyss*, siva digl 2008, igl onn da fundaziun dalla pps regiun Alvra ed igl «cor» da chella sezziun. El è er sa musso ventirevel tgi *Magdalena Martullo-Blocher* è neida cun pla-

sheir a Lai per sa preschentar a vigl e giuven. Tot cuntaint era igl president activ alloura er tgi igl interess pigl referat digl giast prominent è attratg passa 120 persungas. La referenta è detg tgi igl sies om fetscha da preschaint la patenta da tgatscha e chegl sen cunsegl da divers catscheders tgi seian stos dalla parteida chel de digl vintschigliung dalla nova tgesa da vacanzas. Cun en surreir è la donna da Meilen detg tgi seia bagn er ainten la politica en avantatg dad aver ainten tgesa en bung tiradour. Scu adegna puspe durant l'antiera seira è *Magdalena Martullo-Blocher* er retschet siva da chels plects bler applaus digl grond public.

## Mantigneir chegl tgi vagn

Ainten ena interpresa dovrigl novaziuns ed invenziuns, dantant ainten la politica fess migler da rinforzar e sviluppar las atgnas fermezzas anstagl da disfar tot, chegl tgi igl cunsegl federal ed igl parlament fetschan da preschaint. «Mantigneir chegl tgi vagn fess savens migler tgi sa vischinar adegna pi ferm all'Uniuin europeica, scu chegl tgi ena gronda part digl parlament ed igl cunsegl federal lessan», è detg *Magdalena Martullo-Blocher*. Igl spazi liber, la libertad, la neutralitad e l'indipendenza, chegl totga tar la Svizra e tar sia cultura, er schi dalla vart sanestra vegian chels aspects adegna pi

paca muntada. Ena part digl cunsegl federal, pero cunzont igls sanesters ed er las parteidas da mez promovon e sustignan ferm l'energeia solara ed eroelectricra e tralashan fitg la forza hidraulica, tgi seia er aint igl taimp dad oz ed igl futur da gronda valour. Gist pigl cantun Grischun seia la forza hidraulica adegna stada da gronda impurtanza e chegl vigna er ad esser venavant uscheia.

## Delegar ed aver confidanza

*Magdalena Martullo-Blocher* è digl meini tgi aint igl parlament federal mancan persungas tgi fetschan betg angal politica. I dovra represchaintants tgi lavouran e magnan interpresas e betg angal teoretichers. Alla Svizra fasschess angal bagn schi dess damanc politichers professiunals e da chels tgi surpiglessan duple responsabladad a Berna. «Ainten la tgesa federala ed ainten igls departamaints cumondan oz prest igls funcziunaris (Beamte) e betg igls parlamentaris ed igl cunsegl federal», è punctuo la referenta. La Svizra vegia ansomma mengia blers da chels uffizials ed er giurists tgi s'occupan cun leschas, scumonds e prescripziuns. Per neir per exaimpel tar ena lubientscha da biagier dovrigl ena birocraschia, chegl tgi seia ple u manc tot taimp pers scu er tar otras dumondas. *Magdalena Martullo-Blocher* crei betg tgi tar las elecziuns naziunales digls 18 d'otgover 201 vignigl tar en schinumno «Rechtsrutsch». «A nous vogl anc mengia bagn ed anc è la veia dolorosa mengia lontanta», è accentuo la candidata pigl cunsegl naziunal. Vess ella da neir eligenda resta betg oter da tgi delegar aint igl travagl a Domat ed aver confidanza ainten igls bungs e fidevels ampluias. Sen la direzziun dalla «EMS Chemia» less la patrunga *Magdalena Martullo-Blocher* an nign cass renunztgier.

# Mintgign en pitschen star

Surses: De da sport dalla scola primara e dalla scoletta

DA GION NUTEGN STGIER / ANR

■ **Igl motto tar igl de da sport cun 138 unfants è sto: sa participar è pi impurtant tgi gudagner. Tgunsch pussebel tgi per l'egn u l'oter digls unfants tanschigl da sa qualifitgier pigl final grischun dalla coppa «UBS Kids».** En de da premaveira ampernevel è do la culischa agl amprem de da sport communabel dalla scola primara e dalla scoletta Surses. Sa participos all'occurrenza èn 138 unfants da Beiva anfignen Salouf. Igl de da sport ins è gist cumbino cun la coppa «UBS Kids», ena occurrenza sportiva tgi sa drezza ad unfants da seis anfignen 13 onns e tgi vign sponsorisada dalla banca «UBS». La participaziun alla cop-

pa è betg obligatorica e tuttegna sa participeschon a chella scolas da tots 26 cantuns dalla Svizra. Per mintga scolar e scolaria paia la «UBS» ena pitschna contribuziun e tots unfants retschavan er en regal natural. L'iniziativa da cumbinar igl de da sport cuagl «UBS Kids» è neida da *Cornelia Candreaia*, egna dallas mussardas dalla scoletta a Savognin. Sia proposta da cumbinar chellas dus occurrenz veva gio avant en onn catto accoglientscha ed er chest onn è chegl sto uscheia cun esser tot las scolas primaras reunidas.

## Treis disciplinas

Tar la coppa «UBS Kids» dattigl per mintga annada ena categoria e chegl

egna per las mattas ed egna per igls mats. L'occurrenza cumpeglia treis disciplinas. Migler tgi igl resultat è, e daples puncts dattigl alla fegn. Sa misiros èn damai igls 138 mattatschs e mattatschas ainten la disciplina correr 60 meters, gia da pattar on els er ena balla da 200 grams e segl program è er sto sagl lung. Igl unfants on sa tgapescha spitgia cun gronda tensiun sen la partenza dallas cursas. Singuls eran pi concentros, oters pitost nervous e varsaquants vevan betg schi grond tgatsch per scumenzar l'occurrenza da sport. Cun discorrer cun igls unfants è sa musso tgi gist tar igls pi pitschens è igl correr stada la disciplina preferida. Gia ins è ansomma pitost l'impressiun tgi igls pi giuven on piglia pi serious las oc-

currenzias tgi igls scolars dallas davosas classas primaras.

## Averts, spontans e simpatics

An general ins dastga deir tgi tots èn suandos agl motto: sa participar è pi impurtant tgi gudagner. Crudo an igl è er tgi igls unfants èn oz fitg multicultural, els èn er fitg averts, spontans e simpatics. Applaus è mintgign retschet e chegl igl pi spert scu er igl pi plang. Chegl conferma er tgi igl contact tranter igls unfants è bung e chegl tranter igls unfants indigens u er igls schinumnos «secondos». Da sperar è tgi tanscha a l'egn u l'oter unfant da Surses pigl final grischun dalla coppa «UBS Kids» tgi è li an diesch deis a Coira, schi betg gist pigl final sviz-

zer a Turitg digls 5 da settember 2015 cun ena participaziun da 600 unfants. Siva giantar vevan las scolastas ed igl scolast preparo en program da divertimaint cun da tottas sorts gis da gruppas. Ad ena gruppa on appartignia unfants dalla scoletta anfignen la 6avla classa, chegl tgi è bagn er igl migler per promover igl spiert da gruppa. Totpiglia seia igl de da sport sto en success, uscheia tg'ins possa far ena bilantscha positiva, dei *Cornelia Candreaia*. Cuntaints parevan er igls unfants e chegl betg angal igls treis amprems tgi on retschet en diplom, mabagn tots. Per en de è mintgign sto en star dad atletica leva e chegl independent digl resultat e digls puncts. Detg oter mintgign en Usian Bolt da Surses.



Victouras e victours dallas mattas e digls mats tar igl de da sport dalla scola primara e scoletta Surses. FOTO G. N. STGIER



Sagl lung è er stada ena disciplina tar chel de da sport.

FOTO C. CANDREAIA